

四庫全書

史部

欽定四庫全書

史部

皇朝文獻通考卷

九十九至
一百二

內閣中書_臣寶汝異覆勘

總校官中書_臣孫溶

欽定四庫全書

皇朝文獻通考卷九十九

郊社考九

堂子

臣等謹按

太祖高皇帝建國之初有謁拜

堂子之禮凡每歲元旦及月朔國有大事則為祈為報皆

恭詣

堂子行禮大出入必告出征凱旋則列燾而告典至重也

順治初年以前

堂子在

盛京撫順門外迨定鼎燕京即建

堂子於玉河橋東祭法明備詳載典禮而

內廷虔祀夙夜寅清即古聖王亦保亦臨之義我

皇上詔諸典策明示義法然後知

天神之祀稽古而合敬考典文與

郊

社以義相從

內廷之祭即以類載制度儀節皆備詳焉

天聰九年八月乙巳

太宗文皇帝親謁

堂子行拜

天之禮是歲征察哈爾奏凱師還

太宗率諸貝勒大臣謁

堂子鳴角奏樂拜

天行禮

崇德元年五月以大軍征明

親率王貝勒等謁

堂子行禮拜燾出師

十二月壬申以

親征朝鮮謁

堂子行禮拜燾啟行先是於冬至祀

天即告出征遂告於

廟出師之日設鹵簿吹螺奏樂

親謁

堂子行禮於

堂子外建立八轟吹螺奏樂拜轟啟行次年班師詣

堂子行禮

臣等謹按崇德改元在天聰十年四月是時大軍

四征皆簡師整旅

親率王公大臣詣

堂子行禮乃列燄而拜然後

親莅軍中誠諭遣行奏凱復行展拜殆無虛歲武功赫濯

此其常典矣

七年三月庚辰以克錦州謁

堂子行禮是歲征明之師以錦州捷聞

太宗率王貝勒等陳鹵簿鼓吹謁

堂子行禮復行拜燄之禮

順治元年四月丙寅

世祖章皇帝命王貝勒帥師平定中原

親詣

堂子奏樂行禮拜轟出師

九月建

堂子於京師定上香致祭謁告之禮是年既定燕京即建堂子於長安左門外玉河橋東街門北向內門西向正中

為祭

神殿南向前為拜

天園殿殿南正中設

大內致祭立杆石座次稍後兩翼分設各六行行各六重第一重為

皇子致祭立杆石座次親王郡王貝勒貝子公各以次序列北向東南為

上神殿南向崇德元年定制每年元旦

皇帝率親王以下副都統以上及藩王等詣

堂子上行三跪九拜禮順治二年以元旦或

親詣行禮或不行禮令禮部預期題請康熙十一年元旦行禮令鳴贊官贊禮初制

皇帝親詣行禮滿漢大臣皆從康熙十二年令漢官勿隨往後惟王公滿大臣一品文武官隨往行禮又元旦有掛錢之禮初制王貝勒得掛後貝勒以下不掛每月朔日親王以下貝子以上各遣一人齋戒一日詣

堂子供獻每歲春秋二季立杆致祭王貝勒祭三杆貝子

鎮國公輔國公祭二杆鎮國輔國奉國將軍祭一

杆不祭者聽其無爵宗室不祭

今自入八分公均祭一

杆將軍等不立杆致祭

其每月致祭日期初一日

大內致祭以後王貝勒各以次輪一日致祭若遇

大內致祭則應祭者停祭貝子公等亦依次致祭凡

祭三杆者於定期內祭一杆十一日後再祭二杆

其日有兩三家同祀神者以次為先後或應祭之

家有事不能祭預告禮部知會次祭者致祭有事者以間補祭若為馬羣致祭者王公得祭將軍不得祭若違例多祭并爭祀神者有罰凡官員庶民等設立堂子致祭者永行停止每年四月八日

大內並每旗王貝勒一人依次備供

大內及軍民人等不祈禱不報祭不宰牲不理刑名

餘詳
儀注

康熙十三年正月乙亥以遣大將軍王帥師出征

聖祖仁皇帝親詣

堂子行禮次於纛前行禮是歲吳三桂叛逆遣寧南靖寇

大將軍多羅順承郡王勒爾錦帥師之湖廣安西

將軍都統業赫帥師之四川

御正殿授勅即詣

堂子行禮祭旗纛還至西長安門送之行

命王以下副都統以上俱乘馬馳而過十月遣將之江寧

廣東行禮皆同

十四年閏五月癸卯以平定察哈爾凱旋

聖祖迎勞於南苑遂率大將軍王暨諸王大臣詣

堂子行禮

三十五年二月丙辰

聖祖親征噶爾丹率諸王大臣詣

堂子行禮祭旗纛啟行六月癸巳凱旋詣

堂子行禮

五十七年十一月己丑以遣大將軍王帥師出征

親詣

堂子行禮是歲大兵進勦策旺阿喇布坦以撫遠大將軍

帥師

聖祖御太和殿設鹵簿出征大將軍王等以下俱戎服不出征者蟒服以從詣

堂子行禮次鳴角祭旗纛

雍正七年六月乙未以遣大將帥師西征

世宗憲皇帝親詣

堂子行禮是歲大軍進勦準噶爾遣靖邊大將軍出師北路

世宗率大將軍以下及諸王大臣詣

堂子行禮鳴螺祭纛

御東長安門外黃幄

親視大將軍等乘馬啟行

乾隆十三年十一月癸丑以遣大臣經畧金川

皇上親詣

堂子行禮先是四川金川番族逆命

特命大學士傅恒經畧軍事出師之日

皇上率經畧大學士及王公大臣等詣

堂子行禮祭燾禮畢

御長安門外黃幄

賜經畧大學士酒及馬

親視乘馬啟行次年凱旋祇告如初告之禮嗣是乾隆

二十年平定噶爾二十四年平定回部四十一

年平定兩金川出師及凱旋並祇告如禮

十四年五月

詔定出征凱旋告祭

堂子之禮議政王大臣等奉

諭旨

堂子之祭乃我朝先代循用通禮所祭之神即

天神也

列祖膺圖御宇既稽古

郊裡而燔柴典重舉必以時

堂子則舊俗相承遇大事及春秋季月上旬必祭

天祈報歲首最先展禮定鼎以來恪遵罔怠且不易其名

重舊制也考諸經訓祭天有郊有類有祈穀祈年禮

本不一兵戎國之大事故命遣大將必先有事於

堂子正類祭遺意而列蠡行禮則禡也我

祖宗於行營中或別有征討不及歸告

堂子則望祭而列蠡行事其誠敬如此朕思出師告遣則

凱旋即當告至乃

天

地

宗

社俱已祝冊致虔且受成太學而

堂子則弗之及祠官疎畧如

神貺何祀典攸闕異章宜備著議政王大臣詳議具奏朕

親為裁定王大臣等遵

旨議上大兵凱旋

皇帝告祭

堂子之禮請載入會典從之

十九年四月更定王公致祭

堂子建立神杆之制

諭禮部等衙門王公等建立神杆理應按照爵秩等次
設立整齊以肅觀瞻著每翼作為六排每排六分以
未分封皇子等列於前其次則親王郡王貝勒貝子

公等分為六層設立神杆皇子內已受封爵者其神杆視所封爵立於應立之處所有石座不必移動神杆各按爵次更換每年修整一次交禮部會同內務府總管查看繪圖進呈著為例尋禮部等衙門議奏
謹遵

諭旨神杆石座每翼為六排每排為六分

皇子神杆列於前其次親王郡王貝勒貝子公各按排建立但查左翼親王現有七位今一排建立六

杆應將第七位親王神杆列於次排郡王之首其
郡王貝勒貝子公俱按次接續右翼親王四位郡
王六位貝勒二位貝子二位公十七位人數多寡
不一不能每排俱得六人之數應將親王列於前
其次郡王貝勒貝子公按一排六分之數通融接
續叙列奏入從之

四十七年正月元旦

皇上親詣

堂子行禮導迎如儀是年正月初四日上辛祭

祈穀壇禮臣奏請初一日

皇上未詣

齋宮之前拜

神行禮均可各昭誠敬毋容改期並奏禮成還宮時尚在
未入齋戒以前仍導迎作樂以昭大典從之

堂子祀儀

凡歲正元旦

皇帝率王公滿一品文武官詣

堂子行拜

天禮禮部尚書奏請是日內務府官設

皇帝拜位於

園殿外甬道正中鴻臚寺卿率鳴贊官夾道東西面序立

有司陳香鐙內務府總管一人率諸王一等護衛

各一人預詣

園殿內進楮帛鑾儀衛陳

法駕鹵簿

詳見於
鹵簿

午門外日出前十刻禮部堂官詣

乾清門奏請詣

堂子行禮

皇帝禮服乘禮輿出宮前引大臣十人後扈大臣二人
豹尾班執槍佩刀侍衛二十人佩弓矢侍衛二十
人翊衛如儀

駕發警蹕

午門鳴鐘鹵簿前導不與行禮之百官及外藩蒙古
王公台吉朝鮮諸國使臣咸朝服跪送導迎鼓吹
設而不作

皇帝由

堂子街門入禮部堂官二人恭導至內門降輿

皇帝由中門入至

國殿前就拜位南向立鴻臚寺官引王公位丹陛上各官位
丹陛下均南向按翼序立東位西上西位東上鴻

臚寺官奏跪拜興

皇帝率羣臣行三跪九拜禮奏禮成禮部堂官恭導

皇帝出內門陞輿鹵簿前導導迎樂作奏祐平之章

見辭

樂考

皇帝回鑾王公從各官以次退不與行禮之百官等跪

迎如初儀

午門鳴鐘王公隨

駕入內至金水橋恭候

皇帝還宮王貝勒貝子赴

乾清門簇入

坤寧宮祭

神殿行禮

右元旦謁拜

歲以季春季秋月朔日

或二四八月
或上旬
諏吉祭

神於

堂子前一日所司立杆於

園殿南正中石座祭日懸黃幡繫綵繩綴五色繒百纓楮帛二十有七備陳香鐙由

大內恭請

神位安奉於祭

神殿內南向陳饌餌九盤酒琖三

園殿陳饌餌三盤酒琖一楮帛如前數設

御座於祭

神殿檐下西旁鑾儀衛陳

法駕鹵簿如儀日出前十刻禮部堂官詣

乾清門奏時

皇帝御龍袍袞服乘禮輿出宮警蹕扈從百官跪送皆
如元旦儀禮部堂官朝服自街門恭導

皇帝至內門降輿由中門入至祭

神殿陞階至檐下就

御座東向坐諸王貝勒於丹陛上貝子入八分公於丹
陛下均按翼北上東西面相向坐贊祀二人先於

祭

神殿次於

圜殿內均九酌獻三致禱司俎官率執事奏樂舉和畢所

司設

御拜位一於祭

神殿一於

圜殿禮部堂官恭導

皇帝詣祭

神殿

圜殿拜位立贊祀各致祝辭

皇帝各行一跪三拜禮王公序立丹陛下兩傍不隨行

禮禮畢恭導

皇帝至檐下就

御座南向坐王公等各就原處列坐司俎尚膳徹餽尚

茶徹酒

皇帝命分賜王公各祇受訖降丹陛下序立禮部堂官

跪奏禮成恭導

皇帝由中門出陞輿奏樂

回鑾百官跪送王公隨入至內金水橋均與元旦同
恭奉

神位還御如

皇帝不親行禮王公百官不齊集以贊祀致辭行禮越
日為馬祭如儀

右立杆致祭

王公等致祭日立杆於各班位石座至街門外下馬自內門右門入坐於西檐前階下東面

右王公致祭

每歲孟春上旬三日餘月朔日

大內遣司俎官率

堂子官吏於

圓殿奠獻饌酒楮帛贊祀六酌獻三致禱司俎官率執事奏樂舉和贊祀祝辭行禮如儀是日內管領一人

於

上神殿獻饌酒楮帛親王郡王各遣護衛一人於
上神殿獻楮帛凡執事者均先期齋戒

右月祭

每歲孟夏上旬八日司俎官率執事人等自

大內請

佛至

堂子祭神殿陳香鐙獻饌酒王公各遣人獻饌執事設盟

盤贊祀二人浴

佛畢六酌獻三致禱如儀禮畢奉

佛還御

右浴佛

凡出師展拜

堂子

皇帝親征屆日鑾儀衛陳

騎駕鹵簿

詳見鹵簿於

午門外列蒙古畫角十六海螺二百於

堂子街門外左右兵部設

御營黃龍大纛於

堂子內門外之南列各旗纛於後屆時

皇帝御征衣佩刀出宮乘騎前後翊衛

駕至長安橋軍士吸角吹螺

駕入

堂子街門王公以下跪迎隨入螺角止

皇帝降騎禮部尚書侍郎恭導由中門入就

園殿外拜位南向鴻臚寺官鳴贊

皇帝行三跪九拜禮王公等隨行禮畢螺角齊鳴恭導

皇帝詣

旗纛前望纛行三跪九拜禮不贊王公等隨行禮畢螺

角止

皇帝乘騎作樂啟行

右親征展拜

凡遣將出師祇告

堂子出師之日兵部建八旗大纛各一於

堂子南門外之南軍士執螺角列於街門外從征軍士按

翼分列於甬道左右

皇帝駕至長安橋軍士吸角吹螺大將軍以下暨王公

大臣等跪迎於街門之內螺角止禮部尚書侍郎

恭導

皇帝降輿就位行禮羣臣咸隨行禮恭導

皇帝出

堂子內門螺角鳴

皇帝至纛前行禮大將軍以下均隨行禮畢

皇帝回鑾至東長安門外張黃幄升座

賜大將軍酒大將軍率將士謝

恩行禮畢

皇帝命乘馬啟行百官餞送如儀

右遣將祇告

皇帝親征既克有罪諏吉凱旋至日鑾儀衛陳
法駕鹵簿自郊外至

堂子門外

駕至

堂子內門禮部尚書侍郎恭導

皇帝致祭

堂子並如出師祭告之儀大將軍奏凱而還禮部請
旨諏吉陳設如儀屆時禮部尚書奏請

皇帝詣

堂子行禮凱旋將帥大臣及王貝勒大臣俱從禮部尚書

恭導

皇帝行禮均如出師祭告之儀

右凱旋

大內祭

神儀

凡

大內祭

神奉晨祀

神位於祭

神殿西位東向奉夕祀

神位於西北南向日昧爽於晨祀

神位前設饌餌九盤尊一琖一鑪三寅刻進二豕於庭贊

祀就

神位前酌獻祝禱司俎官率所屬奏樂舉和畢贊祀跪致

辭迺剝牲先薦血次熟而薦於俎贊祀酌獻致辭
行禮畢徹饌分俎如儀申刻於夕祀

神位前陳琖五鑪五不酌獻祝禱時伐鼓餘俱與朝薦同
皇帝恭祭

壇

廟齋戒日忌辰清明禁屠日不祭餘日皆祭月朔之翼日
昧爽立杆於庭陳豕一以祀

天司祝致辭畢剝牲先薦血次倫膚為膾並炊穀飯以薦

司祝致辭如前每歲四孟月均用馬牛金幣祇薦
於

神贊祀致辭如儀

皇朝文獻通考卷九十九

欽定四庫全書

皇朝文獻通考卷一百

郊社考

十

山川

臣等謹按王制天子祭天下名山大川五嶽視三

公四瀆視諸侯蓋嶽瀆之為德甚博施甚大故崇

禮以報若巡狩則望秩焉後世代有損益得失各

殊

本朝法古定制祀有常經凡山川之祀皆視其功德協於義法至於

時巡望祭一則虞周封禪之文陋而勿舉尤超越千古云

順治元年定崇祀

嶽鎮海瀆及直省有司春秋致祭之禮定制以

五嶽

五鎮

四海

四瀆配享

方澤壇

見第五卷立

地祇壇於

天神壇之西北向一成方廣十丈縱六丈高四尺四出

陛各六級壇南立青白石龕五刻山形者三為

五嶽

五鎮

四陵山位

詳第五卷

刻水形者二四圍鑿池祭則注水為

四海

四瀆位均高八尺二寸左設石龕二刻山水形各一為

京畿名山大川位右設石龕二製同為

天下名山大川位均高七尺六寸壇方二十四丈歲

遇水旱則遣官祭告祈禱有應則報祭

互見第七卷凡

嶽鎮海瀆所在地方有司歲以春秋仲月諏日致祭祭

東嶽泰山於山東泰安州

今升為府

祭西嶽華山於陝

西華陰縣祭中嶽嵩山於河南登封縣祭南嶽衡

山於湖廣衡山縣祭北嶽恒山於直隸曲陽縣

移祭

見後祭東鎮沂山於山東青州府祭西鎮吳山於陝

西隴州祭中鎮霍山於山西霍州祭南鎮會稽山

於浙江會稽縣祭北鎮暨巫閭山於遼東廣寧衛

今改祭東海於山東萊州府望祭西海於山西蒲

州今升祭南海於廣東廣州府望祭北海於河南

濟源縣

移祭見後

祭河瀆於蒲州祭江瀆於四川成都

府祭淮瀆於河南唐縣祭濟瀆於濟源縣

八年正月

世祖章皇帝親政遣官致祭

嶽鎮海瀆定制恭遇

慶賀大典頒布

恩詔則遣官致祭以四品以上堂官將事北鎮

後魚祭北海

遣官一人東嶽東鎮東海遣官一人西嶽西鎮江

瀆遣官一人中嶽北海淮瀆濟瀆遣官一人南嶽

遣官一人北嶽中鎮西海河瀆遣官一人南鎮南

海

分遣見後

遣官一人諏吉將行先期陳祝文香帛於

中和殿

皇帝親閱遣之

十七年三月改祀

北嶽恒山於山西渾源州北嶽之祭向在直隸曲陽縣

自明孝宗時尚書馬文升議請改祀渾源其疏引

據周禮及明一統志立說甚正以格於部議而止

後屢有言者皆不行至是以科臣援前議請改祀
渾源下禮部議覆從之

康熙六年七月

聖祖仁皇帝親政遣官致祭

嶽鎮海瀆禮儀與順治八年同惟南鎮南海遣官各一
人

十四年十二月以

冊立

皇太子遣官致祭

嶽鎮海瀆

十六年九月加封

長白山之神定致祭禮先是四月中

聖祖命內大臣覺羅武默納侍衛費耀色等詣長白山審
驗明白酌行祀禮至是復命奉

諭旨長白山發祥重地奇蹟甚多山靈宜加封號永著祀
典以昭國家茂膺神貺之意禮部奏言考金大定中封

長白山為興國靈應王又加封帝號明初悉去封號止稱為神請依嶽鎮之禮封為

長白山之神照五嶽例春秋致祭禮儀並同初次往封遣大臣擇地設帳幄立神牌致祭其春秋二祭令寧古塔將軍遣官在烏喇地方望祭遇有

慶典亦應一例望祭即令祭北鎮官前往行禮從之

十八年五月加封

洞庭湖之神遣官致祭時湖南用兵討賊屢捷咸言

湖神助順遣官加封致祭

勅曰頃者逆氛未靖天討用加地當師旅之屯衆賴精英之佑閱時八月波浪不驚俾我六軍舳艫共濟堅城立拔餘孽宵奔眷言捷伐之奇勲實屬神功之丕顯特申昭報式考彝章封為洞庭湖之神載諸祀典專官告祭惟神鑒之

二十一年二月以平定雲南遣官致祭

嶽鎮海瀆

長白山是歲於所遣承祭官外各遣筆帖式一人典守

香帛祭文又各給黃緞繖一御仗二龍旗二牌二

三月

聖祖東巡

盛京望秩

長白山是時

駐蹕吉林烏拉地方於松花江岸東南設幄次

神位致祭行禮

二十三年

聖祖東巡十月

躬祀

泰山之神十一月遣官致祭

嶽鎮海瀆

長白山先是吏科給事中王同祖疏請巡狩燔柴泰山

即過孔林觀禮器九卿議當允行於是禮部議奏

虞舜東巡至於岱宗燔柴致祭漢高過魯以太牢

祀孔子俱係巡歷所至致祭行禮今

皇上聖德神功同符堯舜倣古之制爰事

東巡經過泰山闕里亦應致祭從之至是

親詣

東嶽廟致祭行禮其餘均遣官致祭二十八年

東巡致祭禮同嗣是

南巡所過名山大川均照例致祭

二十五年五月移

北海祀典於吉林望祭

移祭見後

副都御史徐元珙疏言祀

典所載致祭北海尚沿宋明舊制於河南濟源縣
係在京之南於義未合況北嶽已改祀渾源州則
北海應請改祀於混同江庶方位允協下部議行
部臣奏言混同江非奉天所轄應照長白山例在
附近地方設立幄次神位於祭長白山後行望祭
之禮從之

二十七年十月以

孝莊文皇后升祔

太廟遣官致祭

嶽鎮海瀆

長白山

三十二年二月遣

皇長子祭

西嶽華山

詳見第十一卷

三十四年以災異遣官告祭

嶽鎮海瀆

長白山

互見第十四卷

三十五年建

海神廟於大沽海口加封致祭時由天津海道運米
盛京以備賑濟海神效靈往來迅駛乃建廟大沽海
口封為

大沽海口之神遣禮部司官往祭後定祀典用二月
八月中戊日致祭

三月以

親征噶爾丹致祭所過

山川之神是歲

聖祖親統六師北征朔漠三月戊午遣官祭居庸關山川之神丁卯祭獨石口山川之神四月

命大學士祭風雨之神界外山川之神五月祭克魯倫河之神三十六年二月

西巡至保德州及橫城再渡河均遣官致祭黃河之神

至寧夏祭賀蘭山之神凡所歷名山大川均遣官
致祭與因事遣祭之禮同

三十六年七月以平定朔漠遣官告祭

嶽鎮海瀆

長白山

三十七年七月建

永定河神廟於盧溝橋先霸州新安等處屢被水災
發帑濬河以疏水道至是新河告竣

賜名永定河封其神為

永定河之神建廟立碑遣官致祭春秋祀之

九月

聖祖東巡遣大學士致祭

松花江之神

三十九年六月建

海神廟於江南安東縣河道總督張鵬翮疏言遵

旨將海口攔黃壩拆去水勢通流自興工以來風潮不作

海神效靈請建廟崇祀

詔改名大通口封為

大通口海神春秋致祭

四十二年三月

聖祖仁皇帝五十萬壽遣官致祭

嶽鎮海瀆

長白山

十一月

聖祖西巡遣官致祭

西嶽華山

四十三年二月封

淮神為長源佑順大淮之神以河道總督張鵬翮請立

廟崇祀

賜御書靈濟安瀾匾額與安東縣大港口海神廟皆入春

秋祀典

四十八年三月以復行

冊立

皇太子遣官致祭山川如初立之禮

五十二年三月

聖祖仁皇帝六十萬壽遣官致祭山川與四十二年同

五十七年十二月以

孝惠章皇后升祔

太廟遣官致祭

嶽鎮海瀆

長白山是歲遣官將事滿漢編檢以上皆通行開列

六十年三月以

御極六十年大慶遣官致祭山川與

萬壽告祭禮同

六十一年建

江海潮神廟於浙江之尖山時浙江修築石塘工成
巡撫朱軾請建廟於江海匯流尖山之麓廟成

賜御書協順靈川匾額春秋致祭

詳見
於後

六十一年十一月

世宗憲皇帝登極遣官致祭

嶽鎮海瀆

長白山

雍正元年二月以恭上

聖祖仁皇帝尊謚遣官致祭

嶽鎮海瀆

長白山

十二月以

冊立

皇后遣官致祭

嶽鎮海瀆

長白山

二年八月加

江海大神封號少詹事錢以瑄上言請加封江海諸神

有功德於民者下禮部議覆從之於是加

四瀆封號江瀆曰涵和河瀆曰潤毓淮瀆曰通佑濟瀆
曰永惠均遣官齋送祭文香帛令督撫布政使大
員致祭又加封

四海龍神東海曰顯仁南海曰昭明西海曰正恒北
海曰崇禮均如四瀆儀令地方官致祭又封

大沽海口之神加廣惠二字立廟天津又封

浙海潮神為運德海潮之神立廟海寧縣又封

洞庭湖神加涵元滙利四字立廟常德府均致祭如

儀

三年三月封山東臨清州

河神為福漕漳河之神館陶縣

河神為惠濟漳河之神初禮部議覆錢以垣奏以直省
廟祀諸神果有捍禦保障之功者應令請加封號
列之祀典於是山東撫臣以漳河濟漕利運請加
封號歲以春秋致祭允之

是歲致祭

衛源之神衛水源出百泉今運河之經流也河南撫臣疏言百泉之上衛源神祠通漕濟運請列祀典從之仍

御書匾額令巡撫致祭歲以春秋祀之

五年二月以黃河澄清

御製祭文遣官致祭

黃河之神

四年冬督撫諸臣次第奏報黃河澄清地連四省

金史卷一百一十四
時逾二旬諸王大臣請陞殿慶賀

世宗不許諭以河神福國佑民功用顯著宜崇祀典以答
神庥乃遣官分詣清河武陟二處新建神廟致祭
行禮嗣是每昭靈應必遣官致祭

五月重修江南宿遷縣皂河

河神廟春秋致祭

十二月遣官致祭

河源之神於河州口外以黃河澄清及江南淤地利

民故也建祀西寧詳見於後

七年建

江神廟於湖廣武昌春秋致祭內閣奉

諭旨山川之神錫福於地方百姓是以自古帝王皆誠心
展祀以答神貺湖廣境內西南數省之水匯入大江又
為川澤之總匯凡屬土地人民及舟楫行旅皆仗江神
默佑保護安寧允宜建修廟宇按時致祭以崇報享著
湖廣總督巡撫動帑辦理此朕虔禱神祇護國佑民之

意非諂媚以求一己之福也乃建廟於湖北武昌平湖門之外歲以春秋致祭

八年建

海神廟於浙江海寧縣加封為寧民顯佑浙海之神
浙江潮神廟既建於尖山又加封號是歲奉

諭旨朕惟古聖人之制祭祀也凡山川嶽瀆之神有功德於民生能為之禦災捍患者皆載在祀典蓋所以薦馨昭格崇德報功也雍正二年浙江海塘潮水沖決發帑

修築比年以來塘工完整災沴不作居民安業今年潮
汎盛漲幾至汎濫官民震恐幸而水勢漸退隄防無恙
此皆神明默垂護佑惠我蒸民者也茲特發內帑十萬
於海寧縣勅建海神之廟以崇報享著該督遴委賢員
度地鳩工務期制度恢宏規模壯麗崇奉祀事用答明
神庇民禦患之休烈乃建廟於海寧之春熙門內中祀
運德海潮之神以英衛公伍員誠應武肅王錢鏐配

享

二神
見後

其他諸神祀於配殿

世宗御製碑文加神封號遣大臣致祭乾隆十六年二十

二年

皇上南巡皆遣官致祭二十七年後四

巡江浙

往蹕海寧並

躬詣拈香又

命於杭州建廟崇祀立碑皆如海寧之制

詳見
於後

是年建

湘江神廟於湖廣長沙春秋致祭

臣等謹按武昌所祀乃江瀆之神長沙之廟在湘江
橘洲則湘江之神也又湖南之巴陵亦建廟於城
陵磯磯為蜀江洞庭所匯所祀蓋江瀆之神而未
列祭典並識於此

四月建

河源神廟於甘肅河州加封為開津廣濟佑國庇民
昭應河源之神先是以黃河澄清遣官致祭是年

奉

諭旨古稱黃河之神上通雲漢光啟圖書禮曰三王之祭
川也皆先河而後海惟神澤潤萬國福庇兆民自古及
今功用昭著我朝自定鼎以來仰荷神庥尤為彰顯至
於澄清六省之遙閱歷七旬之久稽諸史冊更屬罕聞
朕思江南河南等處皆有廟宇而河源相近之處向來
未建專祠考河源發於崑崙地隔遙邊人稀境僻其流
入內地之始則在秦省之西寧地方朕意於此地特建

廟宇專祀河源之神九卿詳議具奏尋議黃河發源西
番枯爾坤山經河州之長寧驛流入中國應於河
州口外擇地建廟春秋致祭

御製碑文勒石從之十一年十二年皆遣官致祭

十二月封直隸

潯沱河神為長源永濟潯沱河神春秋致祭

九年建

永定河神惠濟廟於石景山永定河即古之桑乾河

源出太原合衆水為流乘高注下其性湍悍畿南
恒被其害

聖祖時親加指示導之安流名曰永定加封河神祀之盧
溝橋雍正七年

世宗以石景山據河上游工程最要既嚴加捍禦因
命擇地建廟廟成遣官致祭

賜名惠濟仍

御製碑文以紀之

十年閏五月建望祭

長白山享殿於溫德亨山

今名望祭山

舊例春秋致祭皆由

寧古塔將軍遣官於吉林之溫德亨山設幄次望祭將軍常德奏請於望祭之處為屋五間與長白山相望既不違望祭之義又足以避風雨庶祀事得盡其誠從之十三年令春秋二祀即以寧古塔將軍致祭叅領以上均齋戒陪祀

七月建

洪澤湖神廟於高家堰春秋致祭高堰山貯石工告成
奉

諭旨洪澤湖賴高堰以為保障建立石工為久遠之計二
年以來風濤恬靜工作易施皆湖神默佑之力宜虔誠
展禮以申報享之忱乃令河臣建廟於堰上歲以春秋
祀之

十三年九月

皇上登極遣官致祭

嶽鎮海瀆

長白山

十一月以恭上

世宗憲皇帝尊諡遣官致祭

嶽鎮海瀆

長白山

十二月致祭河南開封府

河神廟先是河東總督王士俊奏請致祭省城河神

至是禮部請遣官齋祭文香帛以往

皇上以河神顯異曾奉

世宗憲皇帝特旨致祭乃

御中和殿閱視祭文香帛齋送總督行禮致祭

乾隆元年八月

特諭致祭

河神

海神石景山

永定河神禮部奉

諭旨南北河工與浙江海塘關繫國計民生最為緊要
當朕即位元年咸慶安瀾理宜虔修祀典以荅神貺
部臣議於清河武陟海寧三處神祠照例齋送祭文
香帛令總督致祭又令直隸河道總督往石景山
致祭從之

二年正月釐定

洞庭湖神

君山廟神致祭典禮二祠春秋致祀祭品向由有司
具備是歲奉

諭旨洞庭湖神福佑一方靈應顯著君山神廟載在祀
典所有春秋祭品禮儀理應動用正項錢糧辦理著
照湘江之神之例一體開銷以昭敬禮明神至意
四月以恭奉

世宗憲皇帝配享

南郊遣官致祭

嶽鎮海瀆

長白山

十二月以

冊立

皇后加上

皇太后嶽號遣官致祭

嶽鎮海瀆

長白山

三月立

海神廟於江南寶山縣春秋致祭大海自北而南奉
賢寶山南匯上海皆當其衝而寶山三面距洋尤
為險要撫臣請築石塘三百餘丈以資捍禦發帑
成之即建廟於上以祀

海潮之神祀典視浙之海寧

御製碑文紀之

八年八月

皇上東巡

盛京遣官致祭

北鎮廟

長白山

十三年二月

皇上東巡

躬祀

泰嶽增用中和韶樂遣官致祭

嶽鎮海瀆

長白山先是十二年六月

諭內閣奉

聖母皇太后懿旨泰山靈嶽坤德資生近在魯邦宜崇報
享朕不敢違爰遵

懿訓親奉

鑒興秩於岱宗旋蹕青齊觀風布澤以昭崇

聖法

祖教孝省方鉅典大學士等會議以聞尋議奏古者因名
山以升中原有燔柴之禮

聖祖仁皇帝因儀文度數書闕有間議封禪者尤多不經
特允廷議以祀五嶽禮致祭今

皇上東巡致祭泰山應遵康熙二十三年之禮舉行惟
是致祭方嶽向未用樂謹按周禮大司樂奏蕤賓
歌函鍾舞大夏以祭山川是山川之祭自古用樂
今

特舉盛典秩於岱宗請用中和韶樂令儒臣增撰樂章
令太常寺協律郎率樂生豫習備用十三年二月
壬午至於泰安

皇上先詣

岱廟拈香於配天門內降輿由仁安門入三上香行一
跪三拜禮翼日癸未致祭如康熙二十三年之儀
遂奉

皇太后登岱所至祠廟皆拈香致敬奉

諭稽古巡狩兪河喬嶽典禮攸隆朕茲親祀

孔廟有事於

泰山其四嶽四瀆皆宜薦馨用申誠敬著該督就近遴
委大員前往以崇秩祀尋議準祭文香帛仍由京馳
驛齎送

十四年四月以平定金川恭上

皇太后徽號遣官致祭山川如二年之禮

十五年九月以

冊立

皇后恭上

皇太后徽號遣官致祭山川如十四年之禮

十月庚午朔

皇上巡幸中州詣

嵩嶽廟拈香越日辛未致祭如東巡祭岱廟之儀是年

祭祀山川悉準東巡之例以

御道所經遣官致祭黃河之神及衛源神祠

十六年二月

皇上南巡遣官致祭所過

名山大川之神凡巡狩所至禮祀山川是年

皇上南巡於山東祀東嶽泰山之神至江南祀清河縣
河瀆之神淮瀆之神江都縣江瀆之神皆遣官致
祭二月

親祭清河河神廟至浙遣官祭海神廟南鎮會稽山凡
往返渡河渡江致祭之處皆

親詣拈香行禮又詣清口風神廟惠濟祠拈香至泰安
詣岱廟拈香益於懷柔百神之禮無不舉矣

六月加封

永定河神為安流廣惠之神遣官致祭

十二月以

皇太后六旬萬壽恭上

徽號遣官致祭

嶽鎮海瀆

長白山

十九年八月

皇上東巡

盛京望祭

長白山渡松花江祭

江神九月祭

北鎮廟皆

親詣行禮

二十年六月以平定伊犁恭上

皇太后徽號遣官致祭山川如十四年禮是歲以大兵西

征致祭所過

山川之神大軍所經之山致祭者四一曰阿勒台山
一曰珠爾庫柱山一曰博克達山一曰阿拉克山
皆以

詔旨讀文致祭

二十二年

皇上南巡致祭所過

名山大川之神如十六年禮是後四

巡江浙致祭皆同

三月建

海神廟於杭州之觀潮樓

勅封為平潮利涉浙海之神是月

大駕駐蹕杭城奉

諭旨浙海之神自雍正八年海塘告成時

特加褒封

勅於海寧縣地方建廟崇祀邇年以來海波不揚塘工輩
固朕省方浙中親臨踏閱見大溜直趨中小疊兩岸
沙灘自為捍禦濱海諸邑得慶安濶利及生民實資
神明顯佑應於杭州省城之觀潮樓敬建海神之廟
以昭朕崇德答佑至意應行事宜該部查例具奏禮
部奏言雍正八年

勅建海寧海神廟規制典禮具有成案今奉

諭旨於杭州觀潮樓敬建海神廟應令該督撫敬謹相
度擇吉興修工成之日遣官告祭加封神號春秋
致祭悉遵雍正八年事宜舉行並請

御製碑文勒石廟中從之

二十四年十一月以蕩平回部遣官致祭

嶽鎮海瀆

長白山

二十五年定西域

山川諸神祀典先是大軍平定西域新疆乾隆二十四年告祭額琳哈畢爾噶鄂拉歲春秋致祀及是駐劄大臣奏請歲祭博克達鄂拉格登鄂拉穆素爾達巴伊犁郭勒從之嗣後由駐劄大臣次第奏請歲祭者於山則塔爾巴哈台鄂拉塔勒奇鄂拉崆郭爾鄂博阿布喇鄂拉巴爾魯克鄂拉阿勒坦額墨勒鄂拉博爾圖塔克於水則崆格斯郭勒哈什郭勒察罕烏蘇阿里瑪圖郭勒和爾郭斯郭

勒策集郭勒薩瑪爾郭勒奎屯郭勒額彬格遜淖
爾賽哩木淖爾阿拉克圖古勒淖爾額敏郭勒裕
勒雅爾郭勒俱每歲春秋令駐劄大臣致祭其祭
文香帛由京師齋往行禮

二十六年十二月以

皇太后七旬萬壽恭上

徽號致祭

嶽鎮海瀆

長白山更定遣官之制先是嶽鎮海瀆遣官七員分七
差致祭後分遣八員康熙十六年後增祭長白山
特遣一員後與北海同遣共遣官九員乾隆二十
六年左都御史金德瑛奏請與歷代帝王陵寢及
闕里兼行禮部議言嗣後併為六差長白山北海
同遣官一員西嶽華山西鎮吳山江瀆遣官一員
東嶽泰山東鎮沂山東海及南鎮會稽山遣官一
員中嶽嵩山南嶽衡山濟瀆遣官一員北嶽恒山

中鎮霍山 西海河濱遣官一員南海遣官一員其
歷代帝王陵寢及闕里之祀即分道兼舉毋容另
遣從之

是年建楊橋

河神祠先是伏汎河溢祥符遂潰楊橋隄乃鑿引渠
醜河溜兩匝月而合龍爰建祠並

頒額勒碑從大學士劉統勲請也

三十六年建

白河神廟河挾諸山之水而來至密雲流益壯性益
駛其處為

巡幸熱河所必經是年七月霖雨積日河驟漲齧坡岸
浮橋當水衝不可度乃遣官致禱越日漲陡落丈
餘

命於河壩構祠壬辰五月成

御製詩勒石祠內

是年十一月

皇太后八旬萬壽恭上

徽號遣官致祭

嶽鎮海瀆

長白山如二十六年之禮

三十九年四月

封太白山神為昭靈普潤太白山之神建祠祀之

四十一年五月以平定兩金川恭上

皇太后徽號遣官致祭

嶽鎮海瀆

長白山

四十二年三月恭上

大行皇太后尊諡遣官致祭

嶽鎮海瀆

長白山

是年八月

命定兩金川

山川諸神祀典先是四十一年兩金川平該處名山
大川効靈助順應入祀典者

上命副將軍明亮具狀以聞尋奏金川之索烏甲索二
山小金川之墨爾多山均為番衆敬奉大軍進勦
時頗著靈應又金川大河當官兵攻勦勒烏圍時
立柵沿河堅持數日適值陰雨連綿河水旋長旋
消於沿灘柵寨並無妨碍及攻克移柵後河水陡
發前立柵之處均漫水甚大

河神効順實贊成功應請秩祀以彰報功之義爰
命載入祀典用垂久遠

四十三年八月

皇上東巡

盛京望祭北海

命建

北海神廟于山海關並改定望祭處奉

諭海神咸有廟祀惟北海自山海關至盛京一帶向未

專建廟宇以隆禋祀尚屬闕典着於山海關澄海樓
相近處建立

北海神廟以妥靈佑九月又

諭稽考祀典北海原於河南濟源縣望祭河南地屬中
州且非濱海固於事理未協嗣經改於吉林東門外
望祭雖屬北境然距海尚遠亦非所宜所有春秋秩
祀及遇告祭典禮自應恭移於此以協方位

是月

上致祭

北鎮神廟

又奉

諭遼河雙源遙引合而為巨流河襟帶神臯恬波涵潤

實為陪都境內大川朕恭謁

祖陵蹕路所經舟梁利涉緬念

河神之功甚溥著專建

河神廟以昭妥侑

九月

命建

渾河神廟于

盛京城東

諭渾河發源遙遠自東北來入英莪邊門西流幾及千里會遼入海縈護

三陵滋演萬年

靈脈長川襟帶兼衛陪都厥功甚鉅自宜虔崇廟祀以答

神庥著於盛京城東度地鳩工興建

河神廟以昭妥佑

是月建

松花江神廟

諭吉林之松花江導源長白襟帶神臯為本朝

發祥之地綿演億萬載

景運靈長厥功甚鉅自宜虔崇廟祀用迓

神庥已諭令於吉林城外濱江處所度地興建其一

切祀典即照望祭北海之制載入會典

四十五年

皇上七旬萬壽遣官致祭

嶽鎮海瀆

長白山

命廟宇有應修葺者守吏以聞

五月新建

北海神廟成遣親王致祭

十二月改定神廟

敕賜為

敕封時以頒發新建巨流河渾河神廟扁額奉

諭建廟神牌扁額均係褒崇神祀沿用勅賜二字未協
敬謹之意嗣後如遇有建廟封神等事擬請欽定者
廟名著寫勅建其神牌扁額俱著寫勅封字樣

四十七年以豫省青龍岡漫口合龍未就

命乾清門侍衛阿彌達至青海河源祭告

河神是年豫省疏挑引渠自蘭陽至商邱一百七十餘里越歲癸卯春三月河工告成

是年三月

諭朕前歲南巡駐蹕金山即敬書金山靈區安瀾恒佑宏仁廣濟至德尊神牌位供奉神祠及回鑾渡江時雖有風濤而御舟穩渡實賴神佑不可不崇昭秩祀以答靈庥著該部載入祀典嗣後每遇致祭之期著該部封香帛祝文送往交該督撫親詣金山寺行禮

四十八年

皇上東巡

盛京遣官致祭

遼陽太子河

是年

上致祭

北鎮神廟

四十九年

諭此次河水陡長各工險要賴

河神協應得化險為平著蘭第錫等親至

河神廟虔祀以答嘉庥

五十年正月以

皇上御極五十年大慶遣官致祭

嶽鎮海瀆

長白山

是年奉

諭江南洪澤湖向藉淮水挹注今淮水發源之處經畢沅勘明疏濬將支港小河一律浚導該處賈魯惠濟二河其下流歸併渦河入淮現在亦加疏濬俾就通暢并於淮瀆廟虔申祭告自當仰邀

靈佑泉源湧發衆水會歸下游湖水日就充足以助清敵黃至淮瀆廟如果歲久未修或形傾圯即動項興修俟廟工告竣時朕當親書匾額用答

神貺將此諭阿桂畢沅知之尋覆奏南河淮瀆廟一在

裏河廳屬運口每年隨時修理現在完整臣阿桂
親往瞻禮默告一在洪澤湖中盱眙縣境內龜山
之上相傳向著靈異年久未修臣等仰體

聖主誠敬感孚廣邀靈貺之意亦請一體修葺用答
神庥從之

皇帝親祭方嶽儀

時巡省方禮其方

嶽特行

親祭之典有司諏吉豫期守土官潔掃廟宇內外備祭

品牲牢先一日

皇帝乃齋扈從王公百官地方文武官應與祭者畢齋

行在太常寺

凡祭祀皆行在有司贊裏

具祝文

翰林院隨時撰擬

內閣

舍人恭書於版授太常寺官豫送祭所

右具祝版

是日昧爽光祿寺卿一人眖割牲守土官於祭所

神厨設香案光祿寺卿公服上香宰人牽牲告牘

遂及守土官眡宰瘞毛血如儀

右眡割牲

祭之前夕守土官各因其方為瘞坎於廟門之外
工部官張黃幄於廟戟門內之左鑾儀衛官設洗
於幄次太常寺卿屬率守土官入廟供具陳

神位前牛一羊一豕一登一釶二簋簋各二籩豆各十

鑪一鐙一設二案一少西北向供祝版一東次西

向陳禮神制帛一

色各隨其方

香盤一尊一爵三罍勺

具樂部率太常協律郎設中和韶樂於廟階上如
式乃辨位設

皇帝拜位於廟內正中北向司拜褥官二人立於左稍
後陪祀王公位階上百官位階下東西序立重行
異等均北面司祝司香司帛司爵分立祝案尊案
之次司樂協律郎樂工歌工分立樂懸之次記注
官四人立西階下東面御史二人禮部祠祭司官
二人鴻臚寺官二人分立王公百官拜位左右東

西面典儀一人立東階上西面掌瘞官率瘞人立於瘞坎之隅

右供張陳設序位

祭日漏未盡守土大吏率屬治道清蹕自

行宮至祭所汜掃無令塵揚鑾儀衛官陳

騎駕鹵簿於

行在宮門外領侍衛內大臣及內大臣勒所部翊衛官護軍統領宗人府王公勒所部後管官采服分

班於

行宮門外祇候不陪祭扈從官序列

行宮門外守土官序列祭所門前道左陪祭王公於

享殿大門外序列候

駕至隨入內外文武官於享殿庭左右序列執事官豫
入就位均采服屆時太常寺卿赴

行宮奏時

皇帝龍袍補服乘輿出宮前引後扈不陪祭扈從官跪

送如常儀

右

鑾輿出行宮

駕至廟不陪祭守土官跪迎

皇帝於大門內降輿右贊引左對引太常寺卿二人恭導

皇帝由戟門中門入至幄次少俟出盥手鑾儀衛官奉盥巾如儀贊引對引官恭導

皇帝陞中階入殿中門詣拜位前立內大臣侍衛止立
階下後扈大臣隨侍鴻臚寺官引陪祭王公百官
按班均就拜位序立典儀贊樂工登歌執事官各
共迺職贊引奏就位

皇帝就位立

右盥洗就位

典儀贊迎

神司香奉香進至香案前祇候司樂贊舉迎

神樂奏祈豐之章

樂辭方歲不
同俱詳樂考

協律郎舉麾工鼓祝樂

作贊引奏就上香位暨對引官恭導

皇帝詣香案前立對引官至祝案前止贊引奏上香司
香跪進香

皇帝上炷香三上辦香畢奏復位恭導

皇帝復位立奏跪拜興

皇帝行二跪六拜禮王公百官均隨行禮協律郎偃麾

工戛敔樂止

右迎神

典儀贊行初獻禮有司揭尊罍勺挹酒實爵司樂
贊舉初獻樂奏華豐之章樂作司帛奉篚司爵奉
爵以次詣

神案前司帛跪獻篚奠於案三叩興司爵立獻爵奠於
墊中畢皆退司祝詣祝案前跪三叩奉祝版跪案
左樂暫止贊引奏跪

皇帝跪羣臣皆跪贊讀祝司祝讀祝訖興以祝版跪安

於篚內叩如初退樂作贊引奏拜興

皇帝率羣臣行三拜禮樂止典儀贊行亞獻禮司樂贊
舉亞獻奏興豐之章樂作司爵奉爵獻於左如初
獻儀樂止典儀贊行終獻禮司樂贊舉終獻樂奏
儀豐之章樂作司爵奉爵獻於右如亞獻儀樂止
右三獻

典儀贊徹饌司樂贊舉徹饌樂奏和豐之章樂作
有司徹畢樂止典儀贊送

神司樂贊舉送

神樂奏錫豐之章樂作贊引奏跪拜興

皇帝率羣臣行二跪六拜禮樂止典儀贊奉祝帛送座

司祝司帛詣

神位前跪三叩司祝奉祝司帛奉篚司香跪奉香興以

次恭送座所

皇帝轉立拜位旁西向俟過復位立

右徹饌送神座祝帛

祝帛出贊引奏禮成暨對引官恭導

皇帝降中階出中門乘輿還

行宮前列鹵簿導從扈衛如來儀陪祭官退不陪祭
守土官仍於道左跪送扈從官於

行宮外跪迎如儀

右禮成

還行宮

遣官致祭方鎮儀

遣官致祭太常寺具祝文香帛授遣官齋往守土
官豫期潔掃廟宇戒辦牲牢器物備執事人司祝
司帛司香司爵以府州縣佐貳官通贊以教諭訓導
引贊以學弟子員充先祭一日遣官及執事官齋
其夕宰人割牲於厨地方州縣官一人公服眠宰
如儀祭日昧爽守土官率饌人入廟供具陳

神位前牛一羊一豕一豮一釭一釭二簋簋各二籩豆各十
鑪一鐙二設案一於中少西供祝版設案一於左

陳禮神制帛一

色各如其方

香盤一尊一爵三設洗於

階東引贊二人俟於門質明執事官豫入就位均

朝服遣官朝服詣廟引贊引入詣東階下盥手升

階至階中北面通贊贊就位遣官就拜位立贊迎

神引贊引遣官入殿左門詣香案前贊跪遣官跪贊上

香司香跪奉香遣官上炷香三上辦香興贊復位

遣官復位贊跪叩興遣官行二跪六叩禮通贊贊

行初獻禮司帛奉篚跪獻於案三叩興司爵奉爵

奠於正中皆退贊讀祝引贊贊跪遣官跪司祝進
至祝案前跪三叩奉祝版宣讀訖復於案叩如初
退贊叩興遣官行三叩禮通贊贊行亞獻禮司爵
奠爵於左贊行終獻禮司爵奠爵於右均如初儀
贊送

神引贊贊跪叩興遣官行二跪六叩禮通贊贊奉祝帛
送瘞執事官各奉祝帛香由中道送瘞如儀遣官
避立拜位東俟過復位立引贊引遣官視瘞禮畢

引遣官出執事官皆退

右方鎮遣官

遣官祭山川儀

時巡所經輦路三十里內

名山大川遣官致祭太常寺具祝文香帛授遣官齋
往始終儀節與祭

方鎮禮同

右祭所過名山大川

皇帝時巡所過大川上香儀

凡將濟大川守土官於岸治壇設案以紙為神位
式書

神號奉設案上陳果盤五爵三香盤一鑪一鍤二

皇帝親詣上香其日黎明贊引對引預於壇外祇俟太
常寺司香一人預於香案旁祇俟司拜褥官豫奉
拜褥於案前祇俟均公服

皇帝御補服乘輿詣壇導從扈衛如常儀及壇降輿司

拜褥官豫布拜褥於正中退贊引對引恭導

皇帝詣香案前司香跪進香

皇帝上炷香三上辦香畢贊引對引恭導

皇帝就位三拜興出壇登舟司拜褥官徹拜褥退

右

時巡所過大川上香

遣官致祭嶽鎮海瀆儀

凡逢

慶典遣官致祭

嶽鎮海瀆皆因廟行禮望祭者設次於其所致祭豫期

有司諏吉日禮部疏列閣部院寺文職二品以下
四品以上官銜名候

旨分遣承祭將遣官

皇帝散齋一日遣官各齋於次太常寺具禮神香祝

翰林

院隨事
撰擬

制帛

五嶽五鎮四海各如其
方色四瀆色用黑各一

送禮部禮部

祠祭司官各加封題翼日黎明遣官公服會於禮

部太常寺官設黃案於

中和殿正中左右各一均南向鑾儀衛設龍亭一於
禮部堂上正中設香亭一於龍亭前祠祭司官恭
奉祝文帛香設龍亭內校尉舁亭行導以御仗香
亭在前龍亭在後進

大清門中門至

午門前亭止祠祭司官公服詣龍亭前跪三叩恭奉
祝文香帛由

午門左門

昭德門至

中和殿由中門入陳祭文於中案帛左案香右案跪
叩如初由殿左門出退立階下記注官四人序立
於殿西檐下導引太常寺卿二人序立於殿北門
外侍儀禮部尚書侍郎各一人分立殿東西檐之
次又侍郎一人率欽天監博士詣

乾清門奏時

皇帝御補服乘輿出宮導從扈衛如常儀至

中和殿北階上降輿太常寺卿導引

御殿內詣案前北向徧閱祝文香帛畢仍自殿北門乘輿還宮祠祭司官奉祝文香帛出設龍亭內如來儀所司徹案校尉舁亭出禮部尚書侍郎從至禮部陳於堂上正中遣官及齋送香帛筆帖式以次序立於堂左禮部尚書一人於亭左立祠祭司官詣亭前跪三叩以次奉祝帛香授尚書轉授遣官

遣官跪受興授筆帖式依序由中門出若非

親閱太常寺送禮部各加封題禮部尚書率執事官屬
暨遣官散齋一日至日黎明咸公服會禮部祠祭
司官設三案於堂上正中奉祝文設於中案陳香
左案陳帛右案訖退立案前左右贊事禮部尚書
一人敬謹周眡訖以次分授遣官如前儀

右閱祝文香帛遣官

遣官至所祭地守土官潔廟宇備牲牢器物備執

事人遣官暨執事官齋祭日有司供具陳設上香
讀祝行三獻禮一應禮儀並與

時巡遣官祭告同

右祭儀

歲春秋祭儀

歲春秋仲月凡

嶽鎮海瀆所在守土正官一人詣廟致祭執事以禮生

祭用少牢餘並同

慶典遣官之儀

右所在專祭

特祭山川之神儀

所在

名山大川顯著靈異於民有捍禦功者奉

特典遣專官或崇建廟宇落成降香以部筆帖式一人

并祝文齋往守土官就廟致祭陳設儀節並同前

右所在特祭

歲祭山川之神儀

直省所在山川有

勅賜封號立專祠者守土官以時致祭祭日有司具祝
文飭廟戶潔掃祠宇拂拭神案備執事人具器陳
羊一豕一簋簋各二籩豆各十鑪鐙具陳祝文於
案左陳帛一香盤一壺一爵三於案右主祭官朝
服詣祠引贊禮生二人引入拜位前立乃迎

神司香自右奉香盤進主祭官三上香引贊贊跪叩

興主祭官行三跪九叩禮興司帛自右跪授帛主祭官受帛拱舉授司帛興獻於案司酌酌酒實爵自右跪授爵主祭官受爵拱舉授司爵獻於正中退司祝跪讀祝引贊贊跪主祭官跪讀祝畢主祭官行三叩禮興司爵酌酒獻於左又酌酒獻於右退乃徹饌送

神引贊贊跪叩興主祭官行三跪九叩禮興執事者以祝帛送燎禮畢各退各祠儀皆同

右專祠歲祭

皇朝文獻通考卷一百